

**VENDIM**  
**Nr. 570, datë 17.7.2019**

**PËR KRIJIMIN, ORGANIZIMIN DHE FUNKSIONIMIN E AGJENCISË  
KOMBËTARE TË PYJEVE**

Në mbështetje të nenit 100 të Kushtetutës dhe të nenit 6, të ligjit nr. 90/2012, “Për organizimin dhe funksionimin e administratës shtetërore”, me propozimin e ministrit të Turizmit dhe Mjedisit, Këshilli i Ministrave

**VENDOSI:**

**I. DISPOZITA TË PËRGJITHSHME**

1. Krijimin e Agjencisë Kombëtare të Pyjeve (në vijim AKP), si person juridik publik, buxhetor, në varësi të ministrit përgjegjës për pyjet, me seli në Tiranë. AKP-ja financohet nga buxheti i shtetit dhe nga burime të tjera të ligjshme.

2. AKP-ja ka si mision mirëqeverisjen e pyjeve, ruajtjen dhe zhvillimin e tyre, shfrytëzimin e qëndrueshëm e shumëfunksional të burimeve pyjore, si pasuri natyrore me rëndësi kombëtare.

**II. PËRGJEGJËSITË FUNKSIONALE TË AGJENCISË KOMBËTARE TË PYJEVE**

AKP-ja ka këto përgjegjësi:

- a) Sigurimin e performancës në sektorin e pyjeve;
- b) Vlerësimin e gjendjes së pyjeve;
- c) Organizimin e punës për inventarizimin dhe kërkimin në fushën e pyjeve;
- ç) Organizimin e punës dhe hartimin e dokumenteve për menaxhimin e pyjeve;
- d) Organizimin e punës për monitorimin dhe kontrollin e pyjeve.

**III. ORGANIZIMI DHE FUNKSIONIMI I AGJENCISË KOMBËTARE DHE AGJENCIVE RAJONALE TË PYJEVE**

1. AKP-ja e shtrin veprimtarinë në të gjithë territorin e Republikës së Shqipërisë. Ajo organizohet në 2 nivele:

- a) Në nivel qendror nëpërmjet drejtorisë qendrore;
- b) Në nivel rajonal nëpërmjet 4 (katër) agjencive rajonale të pyjeve (këtu e më poshtë ARP).

2. Ministri miraton me urdhër shtrirjen territoriale të ARP-ve dhe qarkun ku do të ngrihet agjencia rajonale.

3. AKP-ja drejtohet nga drejtori i Përgjithshëm, i cili organizon dhe drejton të gjithë veprimtarinë e saj dhe përgjigjet përpara ministrit. Drejtori i Përgjithshëm përfaqëson AKP-në në marrëdhënie me të tretët. ARP-të drejtohen nga drejtuesit përkatës të tyre.

4. Struktura dhe organika e AKP-së miratohen nga Kryeministri, sipas përcaktimeve në legjislacionin në fuqi për organizimin dhe funksionimin e administratës shtetërore.

5. AKP-ja, në përputhje me përgjegjësitë e veta, kryen këto detyra:

5.1. Në lidhje me performancën në sektorin e pyjeve:

a) zbaton politikat, strategjitë dhe programet kombëtare në fushën e pyjeve si dhe ofron mbështetje dhe orientim për institucionet qendrore e vendore, që kanë rol në zhvillimin dhe mbrojtjen e pyjeve;

b) përcakton normativa, standarde, metodologji, udhëzues, rregullore, kërkesa, kritere dhe praktika të unifikuara për ruajtjen, përdorimin/shfrytëzimin, rehabilitimin dhe përmirësimin e burimeve pyjore dhe elementeve silvikulturorë, duke bashkëpunuar sipas ligjit me çdo ministri apo institucion përgjegjës dhe në përputhje me kërkesat për integrimin në BE;

c) përcakton objektivat për sektorin, bazuar në politikat, strategjitë, programet, masat, projektet e hartuara nga ministria përgjegjëse për pyjet dhe identifikon treguesit kyç për vlerësimin e arritjes së tyre;

c) vlerëson performancën e përdorimit të burimeve pyjore përkundrejt objektivave dhe nivelit të përmbushjes së treguesve, si dhe ndërmerr nisma për përmirësimin e performancës;

d) vlerëson funksionalitetin e të gjithë kuadrit institucional në sektorin e pyjeve, funksionet dhe organizimin e tyre, si dhe sugjeron ndërhyrje e përmirësime në rast mbivendosjeje funksionesh, keqorganizim ose mungesë ekzekutimi të detyrave funksionale nga institucionet përgjegjëse;

dh) monitoron dhe vlerëson eficiencën/efikasitetin e produktit apo të impaktit të sektorit pyjor dhe të masave të ndërmarra për arritjen e objektivave;

e) garanton integrimin dhe angazhimin e aktorëve, duke ngritur sistemin e ndërveprimit në mënyrë të integruar dhe gjithëpërfshirëse;

ë) harton dhe mirëmban baza të dhënash, dokumente, manualë, plane, teknika, raporte mbi komunikim-ndërveprimin e aktorëve;

f) ndjek ngritjen dhe funksionimin e komisioneve, të komiteteve apo të grupeve të punës, për çështje që lidhen me menaxhimin e burimeve pyjore;

g) merr masa për parandalimin dhe zbutjen e kërcënimeve, të risqeve dhe të problematikave sociale e ekonomike, që mund të rezultojnë nga shfrytëzimi i burimeve pyjore.

## 5.2. Në lidhje me vlerësimin e gjendjes së pyjeve:

a) vlerëson gjendjen e pyjeve dhe të treguesve pyjorë në nivel kombëtar të treguesve silvikulturorë, të burimeve gjenetike, të agropylltarisë, të tokës, të biodiversitetit, të shëndetit në pyje e kullota etj.);

b) kryen vlerësime në nivel ekspertize dhe përgatit projekte të rehabilitimit për fondin pyjor, kullosor dhe/ose atë të bimëve etero-vajore, në rastet e dëmit të shkaktuar nga ushtrimi i aktiviteteve të ndryshme që zhvillohen në to, me kërkesë të subjektit që shkakton dëmin, ose kur informohet për dëmin në rrugë të tjera;

c) mbi bazën e përpunimit të rezultateve, përgatit raportin mbi gjendjen e pyjeve dhe, pas miratimit nga strukturat përkatëse, dërgon për botim materialin për informimin e publikut;

ç) mbulon marrëdhënien me publikun dhe realizon ndërgjegjësimin publik për rëndësinë e burimeve pyjore dhe angazhimin e gjithsecilit për mbrojtjen e tyre;

ç) promovon e sensibilizon për rëndësinë e burimeve pyjore dhe nxit pjesëmarrjen e përdoruesve të pyjeve nëpërmjet fushatave ndërgjegjëse, botimeve, publikimeve, konferencave, seminareve, forumeve apo konsultimeve;

dh) organizon takime, simpoziume dhe konferenca për arritjet dhe problemet aktuale në fushën e pyjeve, të kullotave dhe të bimëve mjekësore, si dhe merr pjesë e raporton për problemet e mësipërme, në konferenca e takime, kombëtare dhe ndërkombëtare;

e) vlerëson kapacitetet dhe situatën infrastrukturore ekzistuese (asete, teknologji, pajisje);

ë) përgatit e publikon raporte për gjendjen dhe përdorimin e burimeve pyjore, si dhe botime të tjera që kanë lidhje me zonën pyjore.

## 5.3. Në lidhje me informacionin, inventarizimin dhe kërkimin në fushën e pyjeve:

a) projekton, ndërton, mirëmban dhe përditëson sistemin e integruar të informacionit në sektorin e pyjeve, duke garantuar aksesin dhe shkëmbimin e të dhënave sipas ligjit (kadastra apo inventari i pyjeve, baza të dhënash, regjistra);

b) menaxhon bazën qendrore e të integruar të të dhënave, kryen analiza të ndryshme si dhe shpërndan informacionin, duke zbatuar standardet e cilësisë dhe të konfidencialitetit, sipas llojit të përdoruesit, në funksion edhe të hartimit të dokumenteve (politika, programe, plane etj.) nga aparati i ministrisë;

c) përgatit dhe mbikëqyr Inventarin Kombëtar të Pyjeve;

ç) kujdeset për menaxhimin, përditësimin dhe konfigurimin e hartave e të metodave të tjera të prezantimit të të dhënave që kanë referencë hapësinore, duke përdorur sistemin GIS;

d) drejton dhe bashkërendon punën për gjenerimin, grumbullimin dhe përditësimin e të dhënave, cilësore e sasiore, për burimet pyjore;

dh) kryen vlerësime, studime e kërkime shkencore, si dhe propozon qasje, metoda e teknika inovative që kontribuojnë në rritjen e eficiencës së sektorit dhe forcimin e ndikimit të kërkuar;

e) bashkëpunon me institucione shkencore, vendase dhe të huaja, që punojnë në fushën e pyjeve, me universitete, institute dhe qendra kërkimore si dhe me organizata të shoqërisë civile;

ë) nxit studime e projekte për zhvillimin e qëndrueshëm e shumëfunksional të pyjeve në Shqipëri.

f) organizon trajnime dhe kontribuon në rritjen e kapaciteteve të aktorëve që ndërveprojnë me pyjet (institucione qendrore e lokale, biznese, OJF etj.).

#### 5.4. Në lidhje me menaxhimin e pyjeve:

a) garanton mbrojtjen dhe përdorimin e qëndrueshëm të burimeve pyjore;

b) drejton procesin për optimizimin e shfrytëzimit të burimeve pyjore drejt përfitueshmërisë ekonomike, në përputhje me parimet, prioritetet në përdorim e nevojat e vendit, si dhe me kriteret për ruajtjen dhe mbrojtjen e pyjeve.

c) harton, zbaton dhe monitoron plane, programe e projekte që synojnë miradministrimin, ruajtjen dhe zhvillimin e fondit pyjor, në bashkëpunim dhe koordinim me institucione në nivel qendror e vendor, me donatorë/partnerë zhvillimorë, me organizma të shoqërisë civile dhe biznesit;

ç) harton, zbaton dhe monitoron ndikimet dhe efektshmërinë e planeve të menaxhimit të pyjeve dhe të planeve të mbarështimit;

d) vlerëson kosto-përfitimet ekonomike të përdorimeve të burimeve pyjore, bazuar në parashikimin afatgjatë të ofertë-kërkesës.

#### 5.5 Në lidhje me monitorimin dhe kontrollin e pyjeve:

a) harton programin e monitorimit të pyjeve, të treguesve pyjorë që parashikohen të jenë pjesë e këtij programi, të cilët pasqyrojnë gjendjen apo trysninë e ushtruar ndaj pyjeve;

b) monitoron dhe kontrollon zbatimin e kushteve e të kriterëve të përcaktuara në lejet/autorizimet e dhëna për përdorimin e pyjeve;

c) këshillon dhe informon subjektet lidhur me detyrimet ligjore që duhet të respektohen prej tyre;

ç) monitoron pyjet në drejtim të zbatimit të detyrimeve kombëtare dhe ndërkombëtare;

d) zbaton programin kombëtar për monitorimin e treguesve afatshkurtër, afatmesëm dhe afatgjatë në fushën e pyjeve, të kullotave, të bimëve mjekësore, të biodiversitetit të tyre, të ndryshimeve klimatike e të biomasës, në përputhje me aktet ligjore në fuqi, dhe në bashkëpunim të ngushtë me organet e pushtetit qendror, vendor dhe palë të treta të interesuara;

dh) monitoron-kontrollon të drejtat e akorduara nga njësitë e vetëqeverisjes vendore tek operatorët publikë ose privatë, për shfrytëzimin e fondit pyjor, për sa i përket përputhshmërisë dhe respektimit të kriterëve, të kërkesave, të kufizimeve dhe rekomandimeve të evidentuara në planet e menaxhimit e të mbarështimit të pyjeve;

e) monitoron-kontrollon veprimtarinë e strukturave të administrimit e të inspektimit pyjor në njësitë e vetëqeverisjes vendore, për sa i përket zbatimit dhe respektimit të legjislacionit në fuqi e të planeve të miratuara, të cilat ndërhyjnë për marrjen e masave të detyrueshme në rastet kur evidentohen shkelje apo shmangie nga përmbajtja dhe kërkesat e tyre.

#### 6. ARP-të ushtrojnë këto përgjegjësi dhe detyra:

a) Mbledhin, përpunojnë dhe analizojnë të dhëna e informacione për gjendjen e pyjeve në nivel rajoni, të cilat ia raportojnë drejtorisë qendrore, në funksion të krijimit të sistemit të integruar të informacionit pyjor, në nivel kombëtar;

b) Kryejnë monitorime dhe kontrole mbi bazën e riskut, me qëllim sigurimin e ligjshmërisë në çështjet që lidhen me fondin pyjor, zbatimin e kufizimeve dhe të detyrimeve të vendosura në planet e menaxhimit e të mbarështimit, si dhe respektimin e kushteve e të kriterëve të përcaktuara në lejet, autorizimet apo kontratat e dhëna për përdorimin e pyjeve;

c) Ushtrojnë kontrolle, marrin masa për parandalimin e cenimeve dhe të dëmeve në pyje, si dhe njoftojnë e vënë në dispozicion të institucioneve përgjegjëse për inspektimin pyjor dhe hetimin e procedimin penal të shkelësve të gjitha materialet dhe informacionin që zotërojnë;

ç) Koordinojnë veprimtarinë dhe bashkëpunojnë me strukturat përgjegjëse për pyjet në njësitë e vetëqeverisjes vendore dhe me strukturat përgjegjëse për administrimin e zonave të mbrojtura;

d) Sigurojnë mbështetje, asistencë, realizojnë trajnime, ofrojnë informacion dhe këshilla teknike për njësitë e vetëqeverisjes vendore, strukturat përgjegjëse për zonat e mbrojtura dhe subjekte të interesuara, me qëllim realizimin efektiv të përgjegjësisë së tyre në lidhje me pyjet dhe rritjen/zhvillimin e kapaciteteve njerëzore e institucionale në sektorin e pyjeve.

7. Marrëdhëniet e punës së drejtorit të Përgjithshëm, të nëpunësve të AKP-së dhe të nëpunësve të ARP-ve rregullohen sipas dispozitave të legjislacionit për nëpunësin civil. Marrëdhëniet e punës së punonjësve administrativë rregullohen në bazë të dispozitave të Kodit të Punës.

8. Rregullorja që përcakton metodat e brendshme të punës dhe për sjelljen e personelit të AKP-së miratohet nga ministri, pas propozimit të drejtorit të Përgjithshëm.

9. AKP-ja ka stemën, logon dhe vulën e saj zyrtare. Stema e AKP-së përbëhet nga stema e Republikës së Shqipërisë, me shënimet “Republika e Shqipërisë, Ministria e Turizmit dhe Mjedisit, Agjencia Kombëtare e Pyjeve”, në përputhje me përcaktimet e vendimit të Këshillit të Ministrave për mënyrën e përdorimit të stemës së Republikës së Shqipërisë.

10. ARP-të kanë stemën, logon dhe vulën e tyre zyrtare. Stema e zyrave përbëhet nga stema e Republikës së Shqipërisë, me shënimet “Republika e Shqipërisë, Ministria e Turizmit dhe Mjedisit, Agjencia Kombëtare e Pyjeve, Agjencia Rajonale e Pyjeve ... (emri i qarkut ku ka selinë agjencia)”, në përputhje me përcaktimet e vendimit të Këshillit të Ministrave për mënyrën e përdorimit të stemës së Republikës së Shqipërisë.

11. Vula e AKP-së dhe vulat e secilës ARP kanë formën dhe elementet e përcaktuara në vendimin e Këshillit të Ministrave për rregullat e prodhimit, të administrimit, të kontrollit dhe të ruajtjes së vulave zyrtare. Vulat prodhohen, administrohen dhe ruhen në përputhje me legjislacionin në fuqi.

#### IV. DISPOZITA KALIMTARE DHE TË FUNDIT

1. Struktura përgjegjëse për pyjet në Agjencinë Kombëtare të Mjedisit vijon të përmbushë normalisht përgjegjësitë e saj deri në momentin e funksionimit të plotë të AKP-së sipas përcaktimeve të këtij vendimi.

2. Për nëpunësit civilë aktualë të strukturës përgjegjëse për pyjet në Agjencinë Kombëtare të Mjedisit, të cilët transferohen në Agjencinë Kombëtare të Pyjeve, zbatohen dispozitat e legjislacionit për nëpunësin civil në rastin e mbylljes dhe të ristrukturimit të institucionit. Për punonjësit administrativë zbatohen dispozitat e Kodit të Punës.

3. Numri i punonjësve dhe fondet buxhetore të strukturës përgjegjëse për pyjet në Agjencinë Kombëtare të Mjedisit i kalojnë Agjencisë Kombëtare të Pyjeve.

4. Efektet financiare, që rrjedhin nga zbatimi i këtij vendimi, të përballohen nga buxheti i shtetit, nëpërmjet Ministrisë së Turizmit dhe Mjedisit.

5. Ngarkohen Ministria e Turizmit dhe Mjedisit, Ministria e Financave dhe Ekonomisë dhe Departamenti i Administratës Publike për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTËR  
**Edi Rama**